

Massiva critica, clera decisiun

Il cussegl grond nun è unì pertutgant la strategia turistica

■ (anr/ac) **Il cussegl grond ha bain refusà cun clera maiortad l'incumbensa da renviar il credit d'impegn per la promoziun turistica enteifer la debatta dal preventiv. Il cusseglier guvernativ Hansjörg Trachsel ha stui tadlar blera critica vers la strategia turistica chantunala il glindesdi ed il mardi passà en il cussegl grond.** Cun 74 vers

34 vuschs ha il cussegl grond ditg na a l'incumbensa dal deputà *Christoph Jaag* (ps Aschera) da renviar il credit previ per sustegnair il turissem grischun cun ina champagna da promoziun. En il preventiv ha la regenza reservà per quella incumbensa ina summa da 10,5 milliuns francs. La medema summa contribuescha la confederaziun. Il cusseglier guvernativ *Hansjörg Trachsel* ha defendì il mardi avantmezdi avant deputadas e deputads la strategia turistica dal chantun Grischun e l'intenziun da sustegnair innovaziun turistica e la collavuraziun da la branscha suenter la restructuraziun turistica. El ha visà a la confederaziun pronta da medemamain contribuir en chausa e promover il turissem alpin en vista al gea dal suveran svizzer a l'iniziativa da segundas abitaziuns. Sustegn per il plan da promoziun deriva dals turistichers grischuns sco quai che Hansjörg Trachsel ha fatg a savair. «Il sustegniment n'è betg previ per la regenza u per l'Uffizi chantunal per l'economia ed il turissem.» Gist quel uffizi entaifer il departament da Hansjörg Trachsel ha retschavì diversa critica principalmain da la vart da la fracziun liberaldemocrata e da la Partida social-

democrata. Il chau da la fracziun da la pld ha attatgà il cusseglier guvernativ: «Vus avais discuri bler e tuttina ditg nagut.» *Rudolf Kunz* ha vuli savair pli concret co ils daners vegnian impundids e co la regenza veglia survegliar l'effect da las investiziuns. Per *Rudolf Kunz* valan ils gremis da cussegliaziun incumbensads da la regenza nagut. «Nus avain memia blera gliedud en il turissem che dispona da daners che n'appartegnan betg ad els.»

Refusà la critica da la pld

La critica da la Partida liberaldemocrata è dentant crudada sin opposiziun. Il deputà *Jon Domenic Parolini* (pbd Suot Tasna) ha renfatschà a la pld dad esser ina partida da refusaders senza stipular atgnas propostas. Il chau da la fracziun da la pbd ha visà a las stentas da meglierar la situaziun turistica ils onns passads. Ed el ha accentuà las parts positivas da la restructuraziun. Senza la politica activa dal chantun na fissan quellas midadas betg stadas pussaivlas, ha ditg *Jon Domenic Parolini*. Critica vers il cusseglier guvernativ e ses departament è tranter auter vegnida da *Rico Stiffler* (pbd Tavau). Betg encunter il credit sco tal, mabain vers l'agir dal departament da preschentar la strategia senza infurmar la cumissiun per economia e taxas. La proposta da *Christoph Jaag* da refusar il credit per la promoziun turistica e dad incaricar la regenza da crear in messadi pli concret n'ha dentant betg chattà ina maiortad en il cussegl grond. La dumonda è vegnida refusada cleramain. Il preventiv è vegnì approvà cun 108 cunter o vuschs.